

止

園

筆

談

止園筆談卷七

樂亭 史夢蘭 香厓

雪山互西域北爲伊犁諸城準噶爾故國南則回部所居也
越土魯番而西回部八大城城各屬小城五六直西曰庫車
曰哈喇沙爾曰阿克蘇由阿克蘇而北曰烏什冰山在其北
路達伊犁由阿克蘇而西南曰葉爾羌由葉爾羌而北曰英
吉沙爾又北曰喀什噶爾葉爾羌之東南曰和闐又其西則
哈薩克布魯特諸部布魯特之西爲浩罕安集延亦回國也
入城回酋和卓木畢特舊爲準噶爾屬國特得衆心將叛之
準噶爾誘執之於伊犁乾隆十九年定遠將軍班第滅準噶

爾乃釋其二子曰波羅泥都曰霍集占使歸安輯回城霍集占遂煽波羅泥都以叛二十三年將軍武毅公兆惠討平之二逆南走至巴達克山爲其國王蘇爾坦沙所殺並擒波逆次子及家屬獻於朝以幼故宥其次子嘉慶間編入蒙古當差道光六年始以張逆叛亂緣坐發遣烟瘴云其時波逆長子薩木薩克率餘衆卡人西走入退木沙爾因嫉其國王攻巴達克山族滅蘇爾坦沙敖罕怒退木沙爾之不義也亦興兵滅之執薩木薩克以歸薩木薩克襲其祖私惠餘蔭又權譎能鼓煽諸部遂爲回國所尊重其子是爲張格爾時入城入隸版圖北屬於伊犁將軍復以參贊大臣鎮喀什噶爾總

理山南事諸回民輸貢賦効力役安居樂業者將七十年矣
張格爾潛蓄逆志以安集延恆入卡倫販鬻乃僞爲商人雜
其中往來各城窺偵因煽惑白帽回子隱相勾結而太平日
久鎮守者皆不之察也嘉慶二十五年張逆哭以數百騎擾
卡倫及聚兵逐之則已遠遁出沒無常飄忽不可禁制道光
五年秋八月彗星見 上隱憂西陲特調固原提督楊遇
春以原官署理陝甘總督備之冬間張逆復入卡倫鎮守者
巴彥巴圖引兵追之不及過汰勒克部落巴彥巴圖怒其不
阻張逆也以兵臨之回眾方哀乞訴其不知遽縱兵殺掠回
眾遁遂宿烏羣回夜襲殺巴彥巴圖伊犁將軍義烈公慶祥

以羣回肆逆入告

上以慶公措置乖方降授喀什噶爾

參贊大臣使大學士長齡出鎮伊犁張逆聞回部動搖遂進居阿爾回莊以窺邊六年慶公至山南搜捕害巴彥巴圖者悉斬之回部益洶懼張逆乘機煽誘安集延布魯特及白帽回子擁眾直犯喀什噶爾慶公遣副都統烏凌阿等出擊之賊佯退誘至大瑪雜回莊樹木叢密伏賊四起皆戰死城遂陷慶公及從官八十人回子郡王一人死之變聞上特授欽差大臣印於署陝甘總督楊遇春使統陝甘精銳甯夏伊犁滿漢兵二萬刻期進剿六月二十五日復以大學士伊犁將軍長齡爲揚威將軍總統諸將授山東巡撫武隆阿

欽差大臣印馳往軍前與楊遇春參贊軍務以陝撫鄂山
署督印籌畫軍需起復前陝撫盧坤總理糧臺於庫車並發
京營健銳吉林索倫勁旅馳往濟師方張逆之旣陷喀城也
總管額爾古倫失軍東走歸阿克蘇而英吉沙爾葉爾羌和
闐相繼陷沒逆勢益猖獗分賊眾犯阿克蘇守者爲副都統
長清與伯克伊薩克阿布都爾滿協力拒賊長都統令額總
管將騎五百踰渾巴什河迎擊伊薩克分馬械助之賊數千
列陣相俟天忽大風額總管縱馬隊乘風進擊賊大敗遁烏
魯木齊提督達凌阿將兵一千六百來赴援乃與安西協副
將郭繼昌參將王登科協領都倫布都司孫旺列營北岸以

防城守備益固賊盡銳爭渡一日數次皆擊退之賊復乘夜潛至分隊圍都協領郭副將營阻其應援郭副將孫都司力戰破圍額總管引錫泊兵夾擊之賊潰諸將奮勇撲勦北岸之賊皆遁去八月張逆使補伯克二人爲間諜入阿克蘇謀誘回眾翻城阿布都爾滿擒斬之賊復大至諸將與戰於渾巴什河殲戮之無遺陣斬賊首庫爾拔兵丁單超矛斃賊首素爾皮降 旨褒嘉長清 賞戴花翎擢單超爲千總

復賞兵部尙書玉麟花翎以長清其所舉也阿克蘇爲扼要地賊三至皆爲長清等摧破凡擒斬五千餘遂不敢復至北岸東四城以安張逆堅欲陷阿克蘇乃自葉爾羌增遣賊眾

使腹心回酋將之營於柯什坪以俟數冬十月 上念天

時向寒東兵遠行數萬里命署陝撫徐忻人賞一皮衣有衣
者給銀四兩十一月參贊楊制府統陝甘兵先至令固原提
督楊芳渡河擊柯什坪賊盡殲之斬張逆腹心五人而南岸
亦肅清矣十二月長將軍武參贊至諸軍漸集長將軍奉

密旨察回部叛亂之由口詳陳自嘉慶二十年後歷任參
贊松福縱弛斌靜漁色永芹疎防巴彥巴圖濫殺狀 上

震怒治松福罪執斌靜下之獄追奪永芹巴彥巴圖廢襲恤
諡七年春二月三日大軍自渾巴什河進討楊軍門總理翼
長統率滿漢以固原精兵三千分五營爲前鋒楊制府將石

甘肅漢中兵屬馬武撫軍將左川兵屬馬揚威將軍將大隊督後京健吉林索倫錫伯額諾德騎兵各將軍分將之爲兩哨翼四隊而進十二三日過巴爾楚新家莊張逆潛過上河水以灌大軍士馬雖無損而途路泥淖糧運遂滯至大河拐大天蓬小天蓬等處糧絕麪一孟價逾十金殺駝馬供食大帥盡心撫循士卒忍死而志益固二十三日遇賊於洋阿巴特大軍甫立營賊潛以數千騎來攻襲以火器擊走之次日進戰於艮阿思台張逆所遣賊首擁眾三萬餘據沙岡拒敵去大軍二三百里賊叫號不止槍礮齊發楊軍門督前鋒直進令士卒勿叫勿舉火器旣迫賊陣奮呼擊賊刀矛弓矢俱發

左右隊翼而夾擊賊遂大潰楊制府武撫軍窮追三十餘里
斬馘萬餘生俘三千獲性械無算遂入賊營館其穀飽食休
息軍勢大振二十五日至排子伯張逆擁賊十餘萬據沙布
都爾莊掘坎設險伏巨礮十餘於陣前騎賊在中步賊左右
列置陣互二十餘里大軍三萬六千牆進列十里賊以騎誘
我軍將俟近而然礮也將帥知之令步隊勿進以馬隊且前
且卻與相持誘使發礮久之賊礮遺火聲如雷烟燄迷天大
軍鼓噪爭進以連環槍礮急擊之賊死者甚眾猶據渠不退
將軍參贊令步卒奮短兵奔渠殺賊馬軍由左右夾攻安集
延大頭目色提巴爾第馳馬擊鼓督羣賊死鬪大軍馬隊橫

截斷賊陣爲數處槍矢如雨馬甲俱洪阿射色提巴爾第殺之馬甲圖明阿躍入賊陣奪其鐵甲烏槍戰馬賊大敗奔潰我軍悉眾追之突有伏賊萬餘自西北村來橫衝我軍幾爲所斷時後隊不及千人楊制府獨引精兵百餘建大將旗扼橋以拒之立馬橋上鬚髯如神賊望見懼不敢進我軍以大礮擊之俄而前軍遠楊制府督之急擊賊皆敗去追奔三十餘里擒斬四萬餘人陣斬回子大頭目素丕卡克安集延頭目占巴克時已入夜大軍卽地爲營將士執械環坐待曉而進二十八日至大河堤多陵阜沙河賊設十餘所以邀大軍殺聲遠震如深谷水吼將士皆失色楊制府楊軍門鎮定如

常勒兵促隊使前後相應不進者斬前鋒奮勇搏戰口加已
賊大隊始散我軍且戰且進日加申賊大敗悉眾遁去將軍
參贊收眾而憩二十九進軍遇小回男婦數十人攜羊茶迎
大軍言昔爲張逆所逼今願投誠且爲嚮導長將軍詢軍所
從入皆言大路近而賊有火礮埋伏小路雖少遠而無阻將
軍信其言引軍從之乃誘大軍至七里河岸河形如弓外抱
闊十餘丈河橋已斷望對岸長堤環繞林木深邃內隱屋宇
則阿瓦巴特回莊也逆回二十餘萬開大梁三道以俟大軍
列陣林木中旗幟亂飛號鼓交鳴槍礮下擊數千萬聲並發
如山裂海翻頃刻飛火毀地我軍陷其陣中仰攻不利發槍

礮皆落堤下不能中賊固原漢中蘭州兵死力拒河傷亡甚衆諸將色如土或伏隴坎以避轟擊楊制府見事急單騎行陣前臨河督戰鉛丸墜馬前後如雨電制府緩馬徐行安重如無事令將士勿離險要以壯天威軍心大定楊軍門繼至陳賊形勢於制府謂賊左右必有伏兵令後隊將士速移營以防圍截營始移賊萬騎渡上流三隊出大軍後二隊橫截楊軍門暗撤前鋒之半遣五將分統應賊鋒始交賊退移營將半賊復至我軍復還禦時已曠黑賊駐隊舉火照地如晝我軍據高渠暗伏以拒之賊瞻視不明遂不敢進夜漏二下人馬皆未得食乃留百騎爲疑兵守河而暗撤大隊歸營忽

數十萬回同聲誦經繼而槍礮鼓號愈急涌三下大風起沙
石飛擊人幾不能立蕭回子用劄答術也劄答形如小石生
野豬頭腹平馬腹中及蜥蜴尾上回子用之淘於水而誦呪
則致雨震亡繫馬尾而誦呪則致風卽唐書中之赭丹輟耕
錄載其物而不知其名我軍見風作人各自危楊制府迎風
跪禱風不止長將軍以我軍既未能制賊而天地晦霾戰亦
失勢欲退四十里而軍楊制府楊軍門力持不可並慮賊乘
風偷渡搶奪軍械急令健勇馬隊赴河岸防賊甫至河賊果
蟻聚渡水見有備而遁五更風漸微過聞賊中連呼胡大托
巴胡大譯言天托巴譯言利害也楊制府知其計窮乃與軍

門議分將驍健楊軍門從旁擊賊隨地搶渡楊制府引眾直
前擊其中堅長將軍令哈郎阿勒罕保由左右繞出賊後
既戰賊佯退步軍以連環槍噴筒急擊之賊馬隊突烟冒火
死力拒鬪一紅衣賊目引伏賊出援哈郎阿等從莊後掩殺
敗遁楊制府既渡河奪堤賊眾失勢鼠竄奔潰斬級三萬
餘生擒二千餘陣斬安集延大頭目阿瓦子邁瑪底那爾巴
持阿渾窮追至洋達瑪河賊四散迸逸大軍盡勦沿河回莊
匿賊見紅衣黃衣二賊馳向喀城大軍以爲張格爾也盡銳
逐之薄喀城一賊棄馬城中賊縋布引之上矢石交下我軍
遂圍城且攻且撫夜半下之擒賊黨趙通事推呼漢大小頭

目百餘斬之搜捕張逆則不知何時是處矣三戰之捷也

上大喜命禮部恩賜展頒珍器始晉將軍太子太保兩

參贊優敘繼晉將軍崇輅楊制府晉太子太保武撫軍加太

子少保權備員貝洪阿舒明阿爲驍騎校員洪阿賞藍翎大

軍駐喀城三日三月四日楊制府將兵南取英吉沙爾將至

英城回散投賊縛獻賊首大軍去城二里而營遣將偕阿奇

木伯克等入城安撫搜擒餘賊制府令裒張逆陷城時被害

積骸爲大塚建祠顏曰招忠斬羣賊剖心以祭而張逆卒無

蹤跡奏入 上以政縱首逆革長將軍崇輅降楊制府太

保撤武撫軍少保制府子國佐撫軍子慶安軍功皆不敘諸

將仍敘功升輜六日楊制府令隨營阿克蘇回日頭等侍衛
阿布都爾滿先赴葉爾羌察探而自引軍繼進至倭巴阿侍
衛引葉城大小伯克阿渾迎降縛獻賊首烏舒爾巴凱等十
一人拿獲從賊一百六十制府駐營城外十里辦理如英城
時城外餘黨猶多遣將分剿淨盡傳檄應賞追捕張逆

上以阿侍衛乃郡王哈迪爾之姪世篤忠貞起哈迪爾爲內
大臣授阿布都爾滿爲葉爾羌阿奇木以寵之楊制府令楊
軍門分兵取和闐和闐賊首玉努斯勇悍無敵羣回畏如虎
聞官軍至引眾出迎拒楊軍門力戰破之玉努斯遁走生擒
賊首噶爾勒達下和闐玉努斯走向游灘復與喀城逸賊卓

雀爾各糾合餘賊死拒我軍楊制府令重慶鎮總兵余步雲
追捕玉努斯永昌協副將胡超追捕卓霍爾大破其眾擒斬
二酋長將軍奏隨營回部貝子伊薩克拿獲探信賊匪布魯
特巴依莫特四人搜出喀城通事推列特與從逆阿渾愛敬
書訊知張逆竄居木吉並余步雲胡超擒賊功奉 旨褒

嘉余鎮晉銜提督胡協以總兵卽用復以兵燹甫靖特

恩免入城六年七年應征賦稅閏五月九日 上以回疆

底定四城克復首逆遠颺且伏暑已近軫念將士勞勩

命長齡酌留官兵其餘次第凱撤十八日 命停止糧臺

轉運降 旨敘將帥功長齡已加太子太保首逆未擒無

可施恩楊遇春以收復一城並遣楊芳取和闐功賞還太子
太保仍交部優敘子都司國佐加遊擊銜武隆阿始以病回
喀城後甫出圖舒克塔什卡倫復以病遽回並無出力之處
無可施恩已授喀城參贊大臣命隨長齡辦理善後嚴緝張
逆楊芳敘柯什坪及和闐功晉世職爲騎都尉並挑乾清門
行走仍交部優敘諸將新授都統哈郎阿副都統阿勒罕保
等議敘有差時軍中探聞張逆在達瓦斯三藏潛伏相去馬
行二十餘日將軍令回目率小回五百將弁數人同往捕楊
軍門將兵五千出卡倫駐營阿艾楊制府將兵三千出卡倫
駐營巴達克山內賽裏湖二十六日楊制府奉 廷寄命

其帥凱撤官兵入關赴都

陛見授欽差大臣印於楊芳

卽以爲參贊大臣六月生擒張逆之姪解京楊軍門復進兵窮搜追捕七月七日遇賊於塔里克打坡側副將郭繼昌憤前迎敵賊據山施槍矢協領壽昌奮勇仰攻殺賊二百餘協領都凌阿委參領郭全先登皆戰死官軍斃紅衣賊目三人賊始退仍負隅抗拒楊軍門督領隊安福分路進攻令郭繼昌等出賊後腹背夾擊擒斬一千五百餘人賊始潰散待衛色克精額委參領巴爾江阿守備蔡汝寅參領哲里善皆沒於陣楊軍門亦收眾而止奏入

上命議恤陣亡將士安

福首先擊賊致受槍傷賞號譽勇巴圖魯而以將軍長齡等

調度失宜不能立定主見籌辦萬全轉屯兵荒徵延日糜餉
致零星賊匪傷及官兵交部議處部議長齡楊遇春楊芳武
隆阿俱革職加 恩改留任十一月 上以張逆愈竄

愈遠追捕杳無端緒

命直隸總督那彥成馳往籌辦善

後事宜那制府奏請從官文武二百餘人十二月 上以

邊陲安靜兵已不用命將軍奎舒解揚威將軍欽差大臣印

遣官齎入都蓋

旨未至而張逆已就擒矣初張格爾既

逸往來卡外諸國諸國以浩罕巴之後皆敬重之官軍既屢
捕不獲楊軍門謀誘致之乃募白帽回子使偽奔訴於張逆
曰自大兵居四城回子實不堪命今楊大將軍已入京大隊

亦撤時近歲除若掩其不備而攻之可大得志而諸回亦得
息肩願以銀五十萬爲獻張逆信之遂復糾約阿坦台布魯
特汰勒克部衆同入犯將至卡部衆懼不敢進張逆怒悉遣
之而自將騎五百由開齊山路潛入向阿爾圖什回莊二十
七日大軍偵騎千總索文馬兵葉榮飛報賊至張逆行二日
將至阿爾圖什覺白帽回子之詐遽飛馬回竄出卡值黑帽
回子持械逐擊之並告大軍楊軍門簡驍將督精騎晝夜急
追之長將軍提兵駐卡倫爲後繼二十九日向午追及於喀
爾鐵蓋山山高氣寒積雪深沒膝楊軍門令馬隊分馳前斷
其路以防竄逸擊殺賊二百餘張逆據山擁三百騎死鬪楊

軍門將馬隊繞出其背麾諸將阿勒罕保等縱兵圍而攻之賊勢不支竄入山谷大軍追殺三百餘人餘賊迸散莫知張逆所在利勇巴圖魯都司段永福縱馬入山從騎僅屬者數人至山口遇白帽回子一人執問之告以張逆甫入此谷並言其服色段都司殺白帽回子而進至山趾則張逆棄馬登山已半十餘賊從之疊嶂摩雲石棱冰滑段都司解狐裘棄馬直上賊擊以鳥槍段都司俯身鉛丸出其上再擊出其左右復擲石下擊不中進益猛顧從兵似稍沮畏段都司大呼曰回子計已窮眾速進遂直前擒張逆從賊八九驚而散走張逆拔刀將自刎段都司奪其刀執之從賊復環集抱張逆

首且叩頭曰此和卓也願勿驚之段都司詰之曰此果張格爾乎賊曰然段都司麾從兵揚發田大武馬甲訥松阿舒興阿盡縛之賊之初擁張逆而遁也遺三十騎胡超額爾古倫伊薩克肅銳掩捕斃五賊餘皆滾山奔竄擒賊首伊斯拉木素皮察克詰知張逆乘青馬衣藍色金絲緞袍綠皮靴既得張逆所向奮勇追捕胡超先馳至山下段都司方縛賊奮前助力楊軍門督軍繼至見段永福短衣持兵挾一回躡山而下遽迎問曰張格爾何在應曰在此楊軍門大喜立解貂以衣段都司遂駐軍分遣將士搜山紅旗奏捷八年正月楊制府 陛辭出都二十四日捷奏至 上大悅天語褒嘉

沛降殊恩封揚威將軍大學士長齡威勇公世襲罔替並授
御前大臣賞戴寶石頂兩團龍補服雙眼花翎復紫韁封參
贊大臣固原提督楊芳果勇侯世襲罔替在御前侍衛上行
走賞戴雙眼花翎用紫韁查其子年若干有無官職皆賞御
用器物並頒賞件參贊大臣署陝督楊遇春山東巡撫武隆
阿雖未與其事追敘三捷復城功與長齡楊芳同開復任內
一切處分加胡超提督銜給騎都尉世職授段永福參將給
雲騎尉世職皆頒賞件加額爾古倫副都統銜擢馬甲訥松
阿舒興阿防禦賞號佩勇巴圖魯擢楊發田大武守備賞號
直勇巴圖魯四人皆賞戴花翎伊薩克晉爵郡王亦頒賞件

文武將吏兵丁回眾皆敘功頒賞祭告 嶽瀆 陵廟

告成太學加上 太后尊號勒石紀功宣諭中外舉行

慶典長齡奏關帝垂佑請於徽號中加數字從之再敘恢復

四城功實授楊遇春陝甘總督兵部尙書都察院右都御史

加長公太保楊侯太子少保那彥成既西出嘉峪關聞張逆

就擒露布過遂留駐關下奏請進止 上命酌減從官仍

往籌辦善後俾長齡交代迅速來京展 覲四月長公至

行郊勞禮錫宴賞四國龍補服時胡超 陛見在都奉

旨入宴並頒賞件五月副都御史誠端等生檻張格爾至

京師獻俘 廷訊磔於市那制府至回疆剔釐積弊增官

并俸酌改營制禁回人不得爲本城伯克伯克不得由通事
進用修城池安兵民西域大定十月三日歲事而歸復留甘
肅辦奏銷九年六月至京 陛見 上命圖功臣長齡

楊芳楊遇春胡超等於紫光閣右西平武功紀盛原本邸鈔
參以王公錫朋自軍中所寄家書錫朋甯河蘆臺人吾邑張
公泰來高足弟子也由武舉任都閫從征西域故知其始末
甚悉後以總兵官死定海嘆夷之難 楊宮保之在川楚軍
營偶病不能戰奎帥伎其能乘公不出盡易其麾下將卒而
以善奔者疲癯者與之公素敢戰疲卒惴惴公顧不復言戰
日視衣食肄技擊偶值賊無多少輒堅壁自守將士或奮請

出公止之曰汝曹未可戰也遇辱賊將士爭請趨利公堅不許衆曰吾公敢戰何今懦若斯雖同列亦謂公失部曲不復能戰也已而又遇辱賊將士環跪請公曰汝曹皆願戰乎譚曰甚願成列而出公身先士卒大破賊請窮追公遽令止歸營語將士曰人人謂吾軍疲而今戰勝可賀也椎牛醢酒闔營盡歡自是量敵出戰戰輒勝用之二月遂爲精兵所向無前而公故部曲懷公恩他人不能用也稍稍亦復歸麾下矣

公麾下材官將校皆百戰精勇征滑縣逆匪時公八日自固原馳至距城二十里而營日暮步登大堤以千里鏡瞰賊營越日公出令將校從過堤十里至一叢祠公下馬令樹

旗幟率將校羅拜遂令歸營將校皆請前擊賊公曰今無一卒止數十員官何以爲戰速歸眾猶不肯齊軍門時官遊擊爲公掌營伍諭之曰今來視戰地明日當全軍出眾乃歸明日公將之濬縣大營見總督令將校十人爲隊者三分路偵賊約合隊中路見公公行至所約處不見一將駐馬望一騎飛馳公驚曰非外委王某乎王至前氣急口又素吃期期再三呼曰速發兵已戰矣公怒曰令汝輩偵賊何爲輕戰此間非大營安得有兵令從校四十速往援而自以僉從十餘人去蓋偵騎出而相遇於路遂議同前嘗賊時賊二萬餘據道口三十騎直前衝擊賊大至千總李鴻春騎生駒驚而墜于

殺數十人然後死柯外委玉亦戰死賊數千已渡河楊都司
躍登浮橋揮刀斬索舟遂流賊後至者不得渡三十騎縱橫
出入賊當之者死傷甚眾將校程貴傷吻裂至耳血戰不已
援騎至刀矛雨下七十騎斬賊幾二千賊來渡者亦驚奔蘭
筏外史誤紀敗績而不知是役非成師也賊與公戰列大礮
三將擊官軍公顧將校曰奪礮應聲飛躍入賊陣賊披靡遂
挾礮而歸地礮之爲賊擲火所然也把總朱祥震死城半摧
賊樹車實土頃刻而固復灌地礮以水公怒令將士斬木聚
之立柵肉薄攻城賊蒼黃抵禦而公已潛令於聚木外別開
曲道爲地礮五日而成賊不知也城旣裂甃石俱飛齊軍門

乘馬躍登賊擲以城輒額足皆傷殞於城下久之蘇解弓矢
援槍復登當前者皆斃乃貫幟而呼賊迸潰衆遂畢登今副
戎段公以生擒張格爾著功名公部曲健將也從公在滑公
偶與當事忤段輒奮欲爲公死在西域一日戰罷步入糧臺
呼曰飢甚速啗我連飲酒數斗忽自持鬚歎曰今竟老矣恐
不足爲 朝廷出力衆詢其故曰今傷而覺痛矣視之脛
洞於槍血殷韡征滑之役以河南兵違楊公軍期故道口敗
賊得從北門入助守而李文成司寨之遁亦由北門出使河
南兵先據其北則事可早蕞蓋聞之從軍將校云顏軍門駿
烈山東人力雄千夫與諸將角技坐胡牀八人攢矛刺之軍

門手矛一揮八矛皆墜地或折柄嘗提督陝西征滑時陝兵
長矛擊刺勁捷如飛楊公甚獎其精銳顏所教練也質異人
不近婦人輒筋骨掣急不適以故雖在行陣無虛夜王廷棟
起自鄉勇馬上揮大刀三十斤前無堅敵楊公愛之收諸麾
下自滑從至陝未久而卒官止把總以上諸事不足爲楊公
重顧其大者國史家乘備之矣茲特記所及知者也類記諸
勇猶是記楊公事之意耳

洪秀泉廣東花縣人世業農道光十七年病死七日甦甦後
卽稱天傳敘遠近貧苦無識者多從之稱曰先生互相誑惑
徒黨日眾先在紫金山爲盜賊黨繼至佛山鎮之愛山寨

楊秀清者湖南衡州耒陽縣民也其父大朋於道光二十五年犯法當斬邑宰並捕秀清秀清懼逃入廣東拜秀泉爲父繼與土匪蕭朝貴馮雲山韋振石達開李振法黃生才七人結盟轉入廣西在鬱林江濱上下劫掠東拿西竄出沒無常如是者兩年時巡撫鄭祖琛因循怯懦不能先事捕戡至三十年庚戌六月金田盜起四方響應學使無可按試始以小寇上聞而賊勢蔓延已駸駸乎不可遏矣嗣是由廣西廣東竄兩湖三江并分股竄及直隸山東等省逆蹤幾遍天下咸豐三年踞江甯僭偽號東南百姓遭其荼毒慘不忍言僞西王蕭朝貴潯州武宣人洪逆妹婿也僞南王馮雲山與洪逆

同縣幼讀書同學相善爲北王章昌輝僞翼王石達開皆澤
州桂平人其初與洪逆傳教者惟馮雲山爲最先其後助洪
逆肆虐者惟楊秀清爲最悍秀清自封爲歡慰師聖神風宋
乃師贖病主左輔正軍師東王千歲後又脅封爲萬歲開科
兩次詩文題皆經呪中語第一次僞狀元江甯人第二次僞
狀元揚州人狀元之外別有幾等名目但取人不多耳有某
生者全家被擄賊黷其才逼令赴考詩題爲四海之內皆東
王其詩曰四海皆情士奚容此跳梁人猶思北闕世忽有東
王文武甘尸素兵民畏犬狂烽煙連郡縣戈戟遍疆場膽爲
紅巾破愁隨黑髮長傷心憐姊妹含淚別爺娘滅賊全憑向

殃民總是楊避秦何處好搔首問斜陽賊以詩涉訕謗遂被害凡賊褻脅之人能寫字者派司筆墨呼之曰先生老弱膽小者任擯擡炊爨之役其餘給長矛刀鎗驅作前鋒退卽斬以二十五人爲一百二千五百人爲一萬每詐稱十萬者實祇二萬五千人耳賊中夜間口號或曰讚美上帝或曰魂得昇天每夜不定何句作爲暗號名火藥曰紅粉礮子曰圓馬擡槍曰長龍鳥槍曰小礮賊不洗臉以愈污愈黑爲上蓋取其面形兇惡令人見而生怖賊赤腳居多間有穿鞋襪者卽係僞職率皆短衣窄袖新褻脅者見大賊目混稱王爺中賊目混稱大人小賊目呼其姓曰某官賊呼其下曰舊兄弟新

兄弟不等每遇訴事老賊往見大賊自新裏脅者不得與

陸戰用火莫著於陸遜梯歸之役水戰用火自赤壁外莫著
於明太祖鄱陽之役然皆草木藁荻之類束而灌脂又趁風
勢雖間以礮礮未聞全用火藥火器也惟建文東昌之戰燕
軍爲火器所乘死者萬餘人味一乘字則戰酣而用非全恃
以決勝也成祖因之有神機銃礮之屬其製始盛五軍鐵騎
恃之益彊至宣宗嘉峰口外之戰先以兩翼飛矢敵不能支
而後以此乘之則用之次第可見自後兵不習戰專倚之爲
護身符敵佯挑戰誘我或先驅所攜人民嘗我火器轟發敵
疊爲進退藥盡敵衝而前全軍潰散甚有不見敵而發火敵

至不及發而先走者則火器反足誤事也

宋淳祐甲辰省元徐霖狀元留夢炎皆三衢人時楊彥瞻以工部郎守衢大書狀元坊以表其閭又揭雙元坊以誇大之鄉曲以爲至榮而二公各以書爲謝且辭焉彥瞻答之略云嘗聞前輩之言曰吾鄉昔有及第奉常而歸旗者鼓者饋者迂者往來而觀者闢路駢陌如堵牆旣而閭門賀焉宗族賀焉媼者及友者客者交賀焉至怙讐者亦茹恥羞愧而賀且謝焉獨居一室局鑰遠引若避寇然余因怪而問之愀然曰所貴乎衣錦之榮者謂其得時行道也將有以庇吾鄉里也今也或竊一名得一官卽起朝富暮貴之想名愈高官愈穹

而用心愈繆武斷者有之兼并者有之庇姦慝把持州縣者
有之是一鄉之榮一害之增也其居日以廣鄰居日以蹙吾
將入山林深密之地以避之是可弔何以賀爲吾聞而異其
言因默識而謹書之凡交遊間必道此語相訓切而非心相
知者不道也執事於不肖可謂心相知相知而不以告罪也
且今日此扁之揭所以獨異於尋常者蓋僕之望於執事者
亦異焉人於此時每以諛獻僕乃獨以忠告非求異於人也
所冀進執事之德成執事之器也執事不以僕之言爲然則
已若以爲然則是扁之揭可以無愧矣前之不賀者必將先
衆人而賀矣今冠南宮者執事友也幸亦以是語之二公得

書爲之悚然

宋周密癸辛雜識云節序交賀之禮不能親至者每以束刺僉名於上使一僕徧投之俗以爲常司馬公在臺閭時不送門狀曰不誠之事不可爲榮陽呂公亦言送門狀習以成風旣勞作僞且疎拙露見可笑則知此事由來久矣今時風俗益薄昔日門狀有大大狀則全紙小狀則半紙今時之刺大不盈掌足見禮之薄矣據此則節下互送名片之風自宋已然

世說稱胡廣以五月五日生本姓黃父母惡之藏之葫蘆棄之河流岸側居人收養及長有盛名父母欲取之廣以爲背

其所生則害義背其所養則忘恩爾無所歸托葫蘆而生也
乃姓胡名廣後登三司有中庸之號

捷夫卽今之所謂報錄人也見宋龔希仲中吳紀聞

北瓊山弔武穆樂府云臣飛死臣俊喜臣浚無言世忠靡臣
檣夜報四太子臣構稱臣自此始詞殿義正與前論大不相
同凡稱史筆

新城王季本題項王廟壁云三章旣沛秦川雨八關更肆阿
房炬漢王眞龍項王虎玉玦三提王不語鼎上杯羹棄翁姆
項王眞龍漢王鼠垓下美人泣楚歌定陶美人泣楚舞眞龍
亦鼠虎亦鼠古今判劉項無此雄快

劉須溪會孟題蘇李泣別圖云事已矣泣何爲蘇武節李陵
詩噫馮海粟子振題楊妃病齒圖云華清宮一齒痛馬嵬坡
一身痛漁陽鼙鼓動地來天下痛陳伯敷釋曾題楊妃上馬
嬌圖云此索清平詞赴沉香亭時耶抑聞漁陽鼙鼓聲赴馬
嵬坡時耶上馬固相似情狀大不同觀者當審諸余觀三先
生之跋語痛快嚴峻抑揚感傷使後世之爲人君而荒於色
爲人臣而失其節者見之甯不知懼乎

元人貫酸齋以樂府得名同時有徐某號甜齋時號酸甜樂
府

宋晏幾道字叔原聚書甚多每有遷徙其妻厭之謂叔原有

類公見搬漆碗

宋田元均狹而長魚軒富貴國女弟閱而短石曼卿目之爲
龜鶴夫妻

史愐痛餘雜錄有叔訟姪者稱其太婦曰蚌夫蠶婦四子甚
新

明杜中立爲義武節度使舊徭車三千乘歲挽鹽海濱民苦
之中立置飛雪將數百人具舟以載民不勞而軍食足飛雪
二字極妙

高尙嘗有言曰世之人以嗜欲殺身以貨財殺子孫以政事
殺人以學問文章殺天下後世識者尊爲名言

何道夫常言官不必高但願衣冠不絕而常爲士類家不必富但願衣食粗足而可以及人

獨醒雜志董侍郎敦逸仕於朝招一鄉人在太學者訓其諸子暇日課其習業不加進侍郎責之曰吾年二十八入學甘齋鹽者凡幾載僅得一第今汝若此何以有成耶鄉人曰公言過矣侍郎乃董十郎兒賢郎乃董侍郎兒其好學之心自不佞矣侍郎之父第十其人故云

勢利所在雖死不忘賢者猶不免況餘人乎廉頗善飯馬援據鞍矍鑠李靖雖老尙堪一行皆爲是也

范文正公曰凡作官者私臯不可有公臯不可無天下名言

北齊書載有落解者作啟事痛詆試官時丁棟光爲試官復其啟曰韞匱而藏何妨於待價之玉踴躍自試眞所謂不祥之金

方望溪云凡爲人子雖其妻而不責以事父母是以娼女待其妻也世有與娼女交而望其孝於吾父母者乎凡爲人婦雖其夫而不順於舅姑是以估客待其夫也世有娼女肯致孝於估客之父母者乎

唐柳氏自公綽以來世以孝弟禮法爲士大夫所宗玆常戒其子弟曰凡門地高可畏不可恃也立身行已一事有失則得罪重於他人無以見先人於地下此其所以可畏也門高

則驕心易生族盛則爲人所嫉然行實才人未之信小有疵類衆皆指之此其所以不可恃也故膏粱子弟學宜加勤行宜加檢僅得比衆人耳古今家誡深切著明孰踰於此而聽之藐藐所在皆是姑識此以示兒輩

生而富貴窮奢極欲無功無德而享官爵又求長壽當如貧賤者何若又使之永年爲造物者無乃太不均乎履富貴者其可不思持之以德

世傳隸書始於秦程邈減小篆爲之便於隸佐故名曰隸書然未有點畫俯仰之態故西京之世金石刻皆鮮用之至東漢時賈魴以寫三蒼其法方大行考洪适所輯西京僅一二

見東漢則不啻數百曆之胡公太公六世孫先秦皇四百餘
年後有發其臨淄冢者棺上有文隱起字與漢隸正同由是
而觀則隸非始於秦也源於周也且非徒源於周也使臨淄
之棺不發孰不謂其必始於秦哉先秦皇四百年已有隸書
矣又焉知先胡公四百年果無之哉去古既遠人無由稽其
詳爾竊意伏羲之畫八卦卽字之本源蒼頡衍而爲古文其
五百四十言列於許慎說文每部之首蓋與篆籀似無大異
此固篆籀之變因之而相生豈隸書獨有待於後世耶

桑悅獨坐軒記云遇聖人則爲弟子之位若親聞訓誨遇賢
人則爲交游之位若親接膝而語遇亂臣賊子則爲士師之

位若親降誅罰於前坐無常位接無常人日覺紛拏糾錯坐
安得獨雖然予之所紛拏糾錯者皆世之寂寞者也而天壤
之間坐予坐者寥寥不謂之獨亦莫予同

國初穆將軍成格驍勇絕倫性喜田犬雖矢石如雨之際牽
挽撫弄亦不離左右人稱細狗將軍

唐法門寺在扶風縣北崇正鎮唐憲宗迎佛骨於此今寺內
有韓文公祠異端正學不兩立後人獨喜調停而並存之可
笑多此類也

止園筆談卷八

樂亭 史夢蘭 香崖

儀禮姑之子稱外兄弟舅之子稱內兄弟間若璩云今人稱妻弟爲內弟非也從史記當稱妻弟從漢書當稱婦弟云云然顏真卿家廟碑銘云祖昭甫士書與內弟殷仲容齊名父惟貞少孤育於舅仲容氏蒙教筆法是仲容乃昭甫之妻弟也而云內弟則妻弟之稱內弟自唐已然

趙高之竊權覆國備載李斯傳中天下後世固無不知其奸惡矣然史記索隱謂高本趙諸公子痛其國爲秦所滅誓欲報讐乃自宮以進卒至殺秦子孫而亡其天下則高直以句

踐事吳之心爲張良報韓之舉此又世論所未及者也金史
宦者梁珣本宋奄人也勸海陵伐宋人謂其與宋通謀使海
陵疲敝國中云

今人演戲以滿牀笏爲郭子儀事案唐書乃崔神慶事也見
本傳

直隸二字見宋史直隸省三字見元史趙普傳普與帝謀令
節鎮所領州郡皆直隸京師得自奏事不屬諸藩於是節度
使之權始輕元地理志序曰唐以前以郡領縣而已元則有
路府州縣四等大率以路領州州領縣而又有腹裏之名腹
裏者一中書省統領燕南山東山西河南河北諸路之地也

行中書省十有一而中書省只二焉其他有一路領府府領州州領縣者而府與縣又有不隸於路而直隸於省者至明竟以直隸爲一省之名 國朝因之若所稱直隸州者則猶元直隸於省之制也

左氏崔杼娶東郭姜以其孤入今之帶來子也

念珠之數一百八顆佛氏之義蓋取其十二月二十四氣七十二候而爲之見瓦釜漫記

江湖閒呼舟子爲家長或疑其卑賤不宜稱之若是然老杜詩云長年三老歌聲裏古今詩話謂蜀中以篙手爲三長老老杜之語蓋本於此又戴氏鼠璞謂海濱之人呼篙師爲長

年則家長之稱有自來矣

韋昭曰凡數三分有二曰大半有一分曰少半大半亦曰强半亦曰太半又枚乘傳尙得十半爲十分中可冀五分也白香山詩家釀唯殘輒半瓶猶小半也十半輒半字甚新

兄弟之孫曰猶孫蓋原猶子而推也見唐元稹李公建墓誌銘

凡僧人偏衫肩下有大環名曰哲那環見鄭元祐遂昌雜錄象牙性堅而製器者雕鏤山水人物細入毫髮間之匠氏云凡牙鐫解之後醃浸經宿則輒如腐雕成再以木賊草水煮之則堅如故矣物理相制有不可解者

始祖曰鼻祖始生子亦曰鼻子見王伯厚漢制考

廣州海中常有浪三日連珠而起聲若雷轟名三口浪相傳
舊有九口馬伏波射滅其六屈翁山先生有射潮歌云后羿
射日落其九伏波射潮滅六口海水至今不敢驕三口連珠
若雷吼人知錢王射潮而伏波射潮罕有知者

浙江鄉試例不出大學題以其不利也廣東亦然或有犯者
非貢院被火則主司有禍而尤忌聖經一章其理有不可解
者梁紹壬云

俗語稱富貴家有朝朝寒食夜夜元宵之語寒食一節古無
賞心樂事豪家俾畫作夜中宵酣戲比曉高眠客之至其門

者見突虛竈冷頗有寒食禁煙之象故以是比之也

外頭趕兔屋裏失獐蘇東坡艾子雜說中語

石殿撰韞玉錢塘權歌五首其一云羅刹江船棗核同碧紗
窗子拓西東行人終日沙頭孔只候潮行不候風註云孔音
闌江船無纜首尾各一穴植木於中以定船謂之曰孔又註
云俗謂八月十八日爲潮生日船上婦人相謂曰同年嫂
雀入大水化爲蛤雉入海化爲蜃蛤與蜃原不皆雀雉所化
也特雀雉所化者亦有之耳予謂輪迴之說亦然謂輪迴爲
必無者宋儒之偏見也謂輪迴爲必有者亦佛氏之妄論也
然觀列子有死於此者安知不生於彼之言則知輪迴之說

自佛氏未入中國以前固已開其端矣

蘇世長本唐名臣而史載其爲刺史因民不卒教責躬引咎自撻於都街伍伯疾其詭撻之見血世長不勝痛大呼走觀者無不笑之此事殊可噴飯

西儒利瑪竇以寫照爲第二我此與世說友爲我之半一語同義

高麗史百三十九卷國人鄭麟趾等編纂其輿服志載蒙古俗剃頂子額方其形留髮其中謂之開剃此元史所未載宋制皇太子卽位於內則市人排舊邸以入爭持所遺謂之掃閣故必先爲之備見葉紹翁四朝聞見錄

史記荊軻傳得趙人徐夫人匕首索隱曰徐姓夫人名謂男子也夫男子而以夫人名猶馮婦男子而以婦名甚奇

列子楚之南有炎人之國其親戚死朽其肉而棄之然後埋其骨朽音寡今俗呼罪至陵遲者曰剛似不如此字爲古然字典不載

文選何晏景福殿賦承以陽馬接以圓方註陽馬屋四角引出承短椽者連接或圓或方也案今廟宇轉角殿所謂飛簷當卽此俗亦稱飛子

鐵冶西去遵化州可八十里又二十里則邊牆矣羣山連互不絕古之松亭關也生鐵之鍊凡三時而成熟鐵由生鐵五

六鍊而成鋼鐵由熟鐵九鍊而成鑪有神則元之鑪長康侯也康當鑪四十日而無鐵懼罪欲自經二女勸止之因投鑪而死眾見其飛騰光燄中若有龍從而起者頃之鐵液成元封其父爲崇宣侯二女遂封金火二仙姑至今祀之

金華子有舉子能爲詩每通名刺云鄉貢進士黃居難字樂地欲比白居易字樂天也此與李白李赤之事相類

利瑪竇萬國全圖言天下有五大洲第一曰亞細亞洲中凡百餘國而中國居其一第二曰歐羅巴洲中凡七十餘國而意大里亞居其一第三曰利未亞洲亦百餘國第四曰亞墨利加洲地更大以境土相連分爲南北二洲最後得墨瓦臘

尼加洲爲第五而域中大地盡矣其說荒渺莫考然其國人充斥中土則其地固有之不可誣也

應庵隨錄泰和楊文貞公父子將早逝母陳氏改贅德安同知羅子理生大司成璟之祖京後子理謫死遼東文貞甫十二歲卽養母及京永樂初文貞官內閣陳氏累贈一品夫人復爲乞恩除免京戍籍回泰和宣德間贈禮部尙書張公鑑卒妻楊氏遺腹生子文質字允中卽改嫁育於祖母王氏正統壬戌文質登進士其繼父已卒乃迎母歸亦養其異父之弟妹至成化間楊氏亦授封太夫人明朝嫁母而歸受封者僅此兩見案張允中尙書吾郡昌黎人其墓在昌黎城西南

六十里外南距樂亭城廿里許俗呼張家老墳余嘗經過其地見楊太夫人之墓獨巋然於眾冢之外旁有諭祭碑並未與其夫合葬初不解其何故今閱此了然尙書明史無傳昌邑舊志亦寥寥三四語無從詳其世系豈以其母改適而有所諱歟

康熙末年順天鄉試及會試房考官特命每房各用二人同閱試卷使之互相覺察彼此鈐制雍正元年仍改照舊章各房止用一人校閱以專責成

雍正三年 上諭 先師孔子聖諱理應迴避前降旨令九卿會議具奏經議凡係姓氏俱加丌爲邱字凡係地名

皆更易他名至於書寫常用之際則從古體止字朕細思今
文出於古文若改用止字是仍未嘗迴避也此字本有期音
查毛詩及古文作期音者甚多嗣後除四書五經外凡遇此
字並加卞爲邱地名亦不必改易但加卞旁讀作期音庶乎
允協

八年

上諭各省選拔生員到京考試前據閱卷大臣

奏稱湖北一卷文理荒疏部議革去選拔及查其姓名則湖
北應山縣生員楊可鏡係明臣楊漣之元孫楊漣之子楊之
易爲江南松江府同知於順治四年遭松江提督吳勝兆之
叛捐軀殉難忠節凜然卽楊可鏡之曾祖也朕思楊漣父子

兩世忠義其後嗣子孫皆稍能自立品行無虧雖文藝不工亦當格外造就該學臣將伊入於選拔之內未必不因此起見但不將緣由奏明是其辦事無識無才之處耳楊可鏡準作選拔赴國子監肄業仍著禮部帶領引見

十一年

上諭朕覽本朝人刊寫書籍凡遇胡虜夷狄

等字每作空白或改易形聲如以夷爲彝以虜爲鹵等字樣閱之殊不可解揣其意蓋妄爲本朝之忌諱曰避之以明其敬慎不知此固背理犯義而不敬之甚者也夫中外地所畫之境也上下天所定之分也我朝肇基東海之濱統一諸國君臨天下所承之統堯舜以來中外一家之統也所用之

人大小文武中外一家之人也所行之政禮樂征伐中外一家之政也內而直隸各省臣民外而蒙古極邊諸部落以及海濱山陬梯航納貢之倫莫不尊親奉以爲主乃復追溯開創帝業之地目爲外夷以爲宜諱於文字之間是徒辨地境之中外而竟忘天分之上下不且背謬已極哉孟子曰舜東夷之人也文王西夷之人也舜古之聖帝而孟子以爲夷文王周室受命之祖孟子爲周之臣子亦以文王爲夷然則夷之字樣不過方域之名自古聖賢不以爲諱也明矣至以虜之一字加之本朝尤爲錯謬漢書註云生得曰虜謂生得其人以索貫而拘之也敵國分隔互相訛詆北人以南爲島夷

南人以北爲東虜漢唐宋元明邊烽不息每於不能臣服之
國反以爲虜我滿洲住東海之濱並非胡人亦從未被虜若
言東夷之人則可今普天之下率土皆臣雖窮邊遠徼我朝
猶不忍以虜視之惟準噶爾背天逆命自棄於王化之外或
可呼之爲胡虜耳至若王師入關漢人順命心悅誠服而爲
臣子在本朝尙不忍以漢人爲虜而漢人轉以此爲本朝諱
豈獨昧於大義並字義亦失之矣夫滿漢名色猶直省之各
有籍貫也文移字跡未便混同初非留此以爲中外之分別
乃昧於君臣之義者不體

列聖撫育中外廓然大公
之盛心猶泥滿漢之形迹於文藝紀載間刪改夷虜諸字以

避忌諱將以此爲臣子之尊敬君父乎不知卽此一念已犯侮慢大不敬之罪而不可追矣嗣後臨文作字及刊刻書籍如仍蹈前轍將此等字樣空白及更換者照大不敬律治罪各省督撫學政有司欽遵張揭告示窮鄉僻壤咸使聞知其從前書籍若一概責令填補更換誠恐卷帙繁多或有遺漏而不肖官吏遂借不遵功令之名致滋擾累著一切曉諭有情願填補更換者聽其自爲之

查士標字二瞻號梅壑散人與華亭同干支又號後乙卯生休甯人居江都

乾隆丁酉巡鹽御史伊齡阿奉 旨於揚州設局修改曲劇

歷經圖思阿並伊公兩任凡四年事竣總校黃文賜著有曲
海二十卷

吳園次綺江都人貢生薦授中書舍人奉 詔誥椒山樂府
遷武選司員外郎蓋卽以椒山原官官之出守湖州多惠政
廉得大猾所在單舸擒而殲之歡聲動地凌忠節公未葬爲
捐俸卜地葬焉湖人稱爲三風太守謂多風力尙風節饒風
雅也

顧狹君嗣立長洲人康熙進士選庶常改中書以疾歸闕秀
野草堂集四方知名士觴詠其中家有古酒器三大者受十
三斤餘遞殺秀野署門曰凡酒客過門請與三雅詰朝相見

上國金言
決雌雄蓋疑其身無與抗者時目爲酒帝

明徐本字以道姑蘇人嗜書每得一書手自披對缺板脫字則界烏絲闌紙乞善書者補之笑謂人曰吾猶老鼠搬生薑勞無用也見湧幢小品吳穀人羣鳥養羞詩社鼠搬薑智蓋用此原註失考

食桃不康見李思戒馮道語出北夢瑣言

廣東東莞呼奴之大者曰蕉葉其名甚新

明武宗製冠翎有三英二英一英之分見明史輿服志案翎以天鷲羽染爲藍色王瓊爲兵部尙書賞一英甚以爲榮今之賞翎蓋仿於此

柳州廬陵皆嘗自表其先人之墓

張守節史記正義發字例云古書字少假借蓋多字或數音

觀義點發皆依平上去入若發平聲每從寅起

寅申巳亥當四維之位平

起寅則上在巳去在申入在亥也

又一字三四音者同聲異喚一處共發恐

難辨列故略舉四十二字如字初音者皆爲正字不須點發

蓋自齊梁人分列四聲而讀經史者因有點發之例觀守節

所言知唐初已盛行之矣宋以來改點爲圈如相臺岳民刊

五經於一字異音皆加圈識之

宋紹熙二年正月三日壬子其夜子時立春洪文敏以劄子

白廟堂云日辰自古以子時爲首今旣子時立春則當是四

日癸丑謂太史之誤

見寶退錄

宋史歷志不載其事是文敏有此

議而廟堂未之行也頃見寶祐四年會天歷是歲立夏四月三日甲子其夜子初二刻則子初係前一日終宋世未嘗改易元明至今猶承其舊洪氏於推步本非專門輒譏太史爲誤非也

秦檜妻王氏陳乞舊所得恩數之未用者自稱沖真先生時王佐爲吏部員外郎持白執政曰婦人安得此名今當追正執政不能聽但寢其請而已後王氏死卒奪先生號見陸游王佐墓志

今人但知送窮不知迎富亦有故事魏華父有二月二日遂

甯北郭迎富故事詩云才過結柳送貧日又見簪花迎富時
此蜀中舊俗不知今尙行之否

南齊周盤龍傳太祖曰我若不沒鹵則應破鹵兒不作孝子
便當作世子俗以居憂者爲孝子蓋本此

孔氏談苑有人問秀州崇儉縣民長官清否曰漿水色言不
清不濁也

宋陳恭公制亳州遇生日親族多獻老人星圖姪世修獨獻
范蠡游五湖圖且贊曰異哉陶朱霸越平吳名遂身退扁舟
五湖公卽日納節明日致仕

宋人有論少陵拙於爲文退之窘於作詩者申難紛然卒無

歸宿獨陳無已默默無語眾詰之無已曰二子得名自古未
易定價若以謂拙於文窘於詩或亦謂詩文初無優劣則皆
不可就其已分言之少陵不合以文章似吟詩樣吟退之不
合以詩句似做文樣做於是議論始定

清字從後豎讀至前漢字從前豎讀至後回字從前橫讀至
後番字從後橫讀至前

金川瑣記載金川喜藝天星米一名喇嘛酥米如黍粒可作
糧食葉經霜紅如老少年秋深滿山紅葉亦一大觀吾鄉所
稱西方穀當卽此

兩金川俱出南瓜其形如巨橐圓三四尺重一二百觔每一

枚輒用四人昇之

正月初三為萬神都會日

三元延壽書

初九為玉帝生日

集錄海

十

二為雲開節

岳陽風土記

十九為收燈日

夢華錄

又名燕九節

邱真

事見帝京景物畧

二十五為填倉日

北京歲華記

二十九為池陽送窮日

天中記

二月初一日為中和節

舊唐書

初二為巢人迎富日又為小遊

江日

俱見歲華記麗譜

又為挑菜節踏青節又為竹本命日

種樹書

初

五為太上齋日

天寶經

初八為芳春節

道經

十二為花朝或以十

五為花朝十六為黃姑浸種日

談薈

通考作三月十二

二

十為小分龍日

談薈

或作四月二十日晴王早雨王水

三月初一為波梨天奏事日

道經

初三為修禊日

初九為高

昌國寒食日

高昌行紀

十一為麥生日

嘉定縣志喜晴

二十為天倉開日

遵生八牋四月十六亦然

二十三為天妃誕日

道書

四月初八為佛生日設浴佛會

荆楚歲時記

十九為浣花日

老學菴筆

記二十八為天休節

道書

五月初一為端一節

乾清歲時記

初四為重四節

溫州府志

十三為龍

生日

岳陽風土記可種竹齊民要術所謂竹醉日也

十六為天地合日

老學菴筆記

二十

為大分龍日

烏程縣志

三十為分龍節

圖經

六月初一為波斯歲首

唐西戎傳

初六為祈六六福日

東陽縣志

十三

為太乙朝元日

道書

二十四為觀蓮節又為九天生日

蠡海集

七月初五為修迎秋齋日

法天生意

十八為散盂蘭盆日

歲華紀麗籍

八月初一為天醫節

潛居錄

初八為竹醉日

山家清事

九月初十為小重陽

輦下歲時紀

十月初三為龍聚日

道經

十五為下元節

搜采異聞錄

十六為盤古

氏生日

路史

又為寒婆生日

農政全書晴王名暖

十九為五百羅漢會經

日藏

經

十一月初一為聚星堂賦雪日

東坡詩序

十五為東坡作重陽日

容齋

續筆

十二月初一為八仙聚會蓬萊日

道書

初八為浴佛日

事物紀原

二為百福日

道經

十三為太乙朝元日

道經

二十四為小節夜

乾清

歲時

二十五爲老子度關日

初學記

二十八爲修迎新齋日

內景

經

二十九爲小除日

北京歲時華記

人皆知糞其田莫知糞其心何謂糞心博學多聞此孟子外書語也今人不求以學糞心而坐使牛溲馬勃充塞胸臆間眞成糞土之牆矣豈不可歎

陳仲子卒孟子誄之曰吁嗟仲子廉潔以保貞兮求名而得名兮數齊國之高士舍仲子其誰稱兮惟山高而水流千古一於陵兮吁嗟仲子名長存兮可慰於九泉兮此載孟子外書中與內篇所論何刺謬若是

外書又云齊人伐趙桃應將問於孟子孟子曰毋嗜殺將心

也毋爭功將才也與士同甘苦將道也使爲將者果能從事斯語將不僅爲名將且可爲名賢然而知此者尠矣

明王忠毅公驥豐功偉烈卓乎一世凡有求詩文者信筆成篇略不經意嘗謂人曰北方老實文字不足爲法答應而已連稟付之可見公之眞誠然公之可傳亦不恃此也

天堂無則已有則君子升地獄無則已有則小人入君子羸得爲君子小人枉了爲小人唐御史李舟語也雖近俚亦理到之言

關史記穰苴傳百姓之命皆懸於君君謂莊賈也又張儀傳舍人曰臣非知君知君乃蘇君是稱人曰君自稱曰臣其來

已久今人印章有稱臣某者蓋本此

蜀中自嘉定至隆慶江間有魚曰魚男廣州文昌縣有井出巨魚紅頂名魚爺見一統志

韓文公送李愿歸盤谷向皆以愿爲西平王長子惟閭若璩博湖掌錄辨李愿別是一人詳漁洋居易錄

自明至 國初曲阜縣知縣皆以孔氏子孫爲之蓋始於後周郭威說見香祖筆記

任邱邊大綬爲米脂令發李自成祖父墓賊旋敗死與唐末黃巢事相類巢事見王氏聞見錄

唐就新格以正五九月爲忌月今人相沿以爲不宜上任戴

令遷安所產可作火爐者別是一種

俗謂異日日月日另字昔命令之令然其字說文玉篇無有也只當作令字戰國策趙燕拜武靈王朝服之賜曰敬循衣服以待今日今日卽異日也注謂令爲善非

使吾心有以勝物則李廣之石可使爲虎使吾爲物所勝則樂令之弓亦能爲蛇此玩鷗亭記中語

大事記嘉靖三十六年馬祖師剪楮爲兵以駭眾各戶多懸龜龜龜龜四字厭之案四字出道藏今人有所鎮壓尙相承硃書粘於門

古書用字各不同不可改易如周禮法多作灋三禮編多作

辯大戴禮而多作如情多作墮邦多諱作域漢書雍多作癰
呂覽僅多作覲期多作旗莊子居多作姬是也當悉依原本
俗妄改竄不可遵也

行李與行理同左傳行理之命

漢書有誰何卒註誰與譙通何與呵通譙呵如今關城盤詰
之例

丈夫無婦曰索見字彙補

秦檜眼有夜光見偃曝談餘

邵康節曰世有溫泉無寒火昭儉晁氏解曰陰能順陽而陽
不能順陰也水爲火爨則沸而熟物火爲水沃則滅矣白虎

通亦謂有溫泉無寒火按西京雜記載董仲舒曰水極陰而有溫泉火至陽而有涼燄又抱樸子云水性純冷而有溫谷之湯泉火體宜熾而有蕭止之寒燄又劉子從化篇曰水性宜冷而有華陽溫泉猶曰泉冷冷者多也火性宜熱而有蕭止寒燄猶曰火熱熱者多也然則寒火亦有之矣特以耳目所未及故以爲無耳海水以杖擊之火星勃然腐草化而爲螢光可照物非寒火乎

喉閉之疾極速而烈前輩傳帳帶散惟曰礬一味然或時不盡驗有老醫教以用鴨觜礬礬研細以醃醋調灌吐出膠痰卽差試之屢驗然膽礬難有真者養生之家不可不預儲以備

用也

治痘瘡倒靨用活狗蠅七枚搗碎和醋酒少許調服神效蠅夏月極多易得冬日則藏於狗耳中

裴度嘗訓其子云凡吾輩但可令文種無絕然其間有成功能致身萬乘之相則天也山谷曰四民皆坐世業士大夫子弟能知忠孝信友斯可矣然不可令讀書種子斷絕有才氣者出便當名世矣似祖裴語特易文種爲書種耳練兼書嘗對書太息曰吾老矣非求聞者姑下後世種子耳周公謹家有書種堂蓋兼取二公之說云

宋時江西人好訟往往有開訟學以教人者如金科之法出

甲乙對答及譁訐之語蓋專門於此從之者常數百人又括之松陽有所謂業街社者亦專以辯捷給利口爲能此最可怪事見癸辛雜識

沈隱侯曰文章當從三易易見事一也易識字二也易讀誦三也乾以易知坤以簡能易簡而天下之理得矣詩之道亦然

詩三百篇有正有變後人學焉而各得其性之所近楚騷之幽怨少陵之憂愁太白之飄飄昌黎玉川之奇詭東野閨仙之寒儉從乎變者也陶靖節以下至於王昌齡王維孟浩然高適岑參韋應物儲光羲錢起輩俱發言和易近乎正者也

白居易以和易享遐齡長吉以瑰詭而致夭折記曰和故百
物不失冬寒故景短夏酷烈而秋悲春日遲遲信可樂也知
此可與言詩矣

楊用修西莊鵲鵲天詞句云彈聲林鳥山和尚寫字寒蟲水
秀才山和尚謂山鵲水秀才滇中蟲名也

雕蟲館曲選論云元取士有填詞科若今括帖然取給風簷
寸屠之下故一時名士雖馬致遠喬夢符輩至第四折往往
強弩之末又謂主司所定題目外止曲名及韻其賓白則演
劇時伶人自爲之故多鄙俚蹈襲之語云云然考元史選舉
志及元典章皆無其事故震亨讀書雜錄言其友秀水屠用

明藏元代皇慶二年鄉試錄一帙所載考試程式與元志無異則元未嘗以詞曲取士也而試錄中有一條云軍民僧尼道客官儒回回醫匠陰陽寫算門廚典僱未完等戶願試者以本戶籍貫赴試僧道應試已屬可笑庀亦赴考尤可怪豈元時有女舉人女進士乎此條存疑

論語曾點曰冠者五六人童子六七人姑以意言之非決定語也啟願錄載北齊石筍取二語者雜組其數以傳會七十二子用爲優戲初時見之止付一笑耳及觀漢舊儀載漢雩祀舞人七十有二其說正以五六冠者爲三十人六七童子爲四十二人則石優戲語漢儒固已用爲實事此其轉誤與

小孤嫁彭郎亦何異也

昔人論畫有云畫山水者有無形病有有形病有形病者易醫無形病則不能醫吾謂詩文亦然凡可以指瑕鑄改者有形病也混然不好不受鑄改者無形病而不可醫也

他說文曰蟲也上古草居患他故相問無他猶言無恙也恙小蟲亦蛇屬今人用無他之語承誤也

元郭翼雪履齋筆記云山兀然不動而已然使之斷續隱顯又能使之多少者雲爲之也觀雲可以慨悟身世

海中漚出魚蜃置陰處有光初見以爲怪嘗推其義蓋鹹水所生凡海中水遇陰晦波如然火滿海以物擊之迸散如星

有月卽不復見木元虛所云陰火潛然豈謂是乎

唐人進士榜必以夜書書必以淡墨或曰名第者陰注陽受以淡墨書者若鬼神之迹也世傳大羅天放榜於蕊珠宮故

又稱蕊榜又放榜後必有一人下世者謂之報羅使

按唐何晦撫言

羅玠貞元中及第開宴曲江泛舟玠以溺死後有閤試前卒者謂之報羅

古者師行二五爲什凡食器之類必共之故曰什物什器又史記五帝紀注什物謂常用者其數非一故曰什

估音古市稅又論物貨也今鬻故衣者概稱估衣局者誤

前漢王莽傳縣宰缺者數年守兼師古曰不拜正官令人守兼也

馬曰匹前漢食貨志布帛長四丈亦爲匹小爾雅倍兩謂之匹俗作疋非

馬屬午晉姓司馬因改司馬官爲典午

翻譯名義合掌作禮曰和南淳化帖衛夫人書衛和南

隱度其辭口以授人曰口占後漢陳遵傳遵常召善書吏於前治私書謝親故憑几口占書數百封親疏各有意

梁冀傳口吟舌言註謂語吃不能明了

唐宦官曰品官見正字通

莊子註云唐子者堂途給使令之人猶周禮云門子耳唐堂途也堂下至門之徑也詳見爾雅及詩註

堪輿天地總名范浚心箴茫茫堪輿俯仰無垠又孟康曰堪輿神名造輿帑書者

女子國在巫咸北郭璞圖讀女子之國浴於黃水乃婦乃字生男則死又東女國女主號賓就見唐書西域傳又扶桑東三千里有女國其人容貌端正身體有毛見通考

同母異父曰外妹左傳成十一年聲伯嫁其外妹於施孝叔佛有妻名耶須見梵書蓮經註

生子曰姓左傳昭四年庚宗之婦人獻以雉問其姓對曰余子長矣能奉雉而從我矣鄭曉曰姓字從女生上古八大姓姜姬媯如羸姁姚姪皆從女

妻父爲婿婿父曰姻今男女之家皆曰姻

婦稱姑曰威姑猶子稱父曰嚴君說文威姑也引漢律婦告威姑正字通按漢律威姑二字宜連讀信如說文訓似告姑姑豈成文理

輟耕錄段繼昌好飲以錢遺之者盡送酒家名酒爲黃嬌蓋關中以兒女爲阿嬌故兒之

宋明帝好鬼神多忌諱改駟馬字爲馬邊瓜以駟字似禍故也嘗以南苑借張永云且給三百年期盡更請見南史前漢食貨志再登曰平三登曰太平

王莽有幼錢前漢食貨志徑入分重六銖曰幼錢直二十

度地論二尺爲一肘四肘爲一弓三百弓爲一里三百六十步爲一里卽三百弓也西域記鼓小者聞五百弓註五百弓二里半也

強葆卽襁褓史記魯周公世家成王少在強葆之中

啟顏錄陳人聘隋問馬價貴賤答曰彌尾躁蹄絕無伎倆不直一錢註彌十結切

明安福鄒賢號易齋爲諸生時學使謁廟講書有講吾與回言終日者學使者問曰論語所載止有問仁問爲邦兩章不知更有何話說終日不休諸生莫能應易齋前對曰顏問仁天德也問爲邦王道也天德王道千古商量不盡何況終日

使者悚然出座曰賢所言氣象冠冕非但科第且理學可分一席

宋元封贈大父母降父母一等封贈父母降本身一等蓋推恩近重而遠輕也然子孫之心終有未安自明以來封贈三代一如現爵教孝之典可謂大備今則更加三級請封矣初止京官後外官亦如之

封典有再醮不得受封之說此爲妻不爲母也近有以母再醮不請封者殊失考

宋晁无咎有入仙案銘蓋取飲中入仙意

南宋時禁食蛙以其似人也今吾鄉食蛙者止用其後股惟

冬間來自關東者白脂黑子最稱肥美名曰哈什馬吳江吳

南榮

振臣

甯古塔紀略稱哈什馬生於江邊淺水處石子下

上半身似鱗下載似鰕長二三寸鮮美可食當別是一種

甯古塔在大漠之東過黃龍府七百里與高麗之會甯府接壤乃金阿骨打起兵之處雖以塔名實無塔相傳昔有兄弟六個各占一方滿洲稱六爲甯古個爲塔其言甯古塔猶華之言六個也

日在午曰亭在未曰映見梁元帝纂要亭至也一曰卽直午之義

遷安馬瑟臣詠會試題名錄清商怨小詞云羣仙名第兩小

紙草草忙刻字到處爭觀無窮愁共喜 他時誰還問起只
一霎興頭而已勘破浮榮歸根皆若此亦覩破之言

北史怡峯字景阜遼西人也本姓默台因避難改爲據此則
墨胎之胎以作怡音爲是

丁憂者具銜稱草土臣見朝野類要

佛寺門兩金剛神是千佛數中最後者一名婁至德一名青
葉譬見范石湖吳船錄按卽今所呼哼呵二將者

鑄像曰寫越語王令工人以良金寫范蠡之狀而朝禮之註
謂以善金鑄其形也

小爾雅五尺謂之墨周語不過墨丈尋尺之間註五尺爲墨

倍墨爲丈今木工各用五尺以成宮室其名爲墨則墨者工師之五尺也

物之稗者曰季周禮地官山虞凡服耜斬季材疏服與耜宜用稗材尙柔忍也又細也小稱也管子乘馬篇季絹三十三又儀禮特牲饋食掛於季指註季指小指也

六書精蘊人心有假者修之於昭昭埤之於冥冥惟慎爲真心

左傳定十四年闔廬傷將指註足大指也言其將領諸指足之用力大指居多手之取物中指爲長故足以大指爲將手以中指爲將

前漢藝文志有黃帝岐伯按摩十卷

韓愈寄崔立之詩當如合分支今時人謂析產符契爲分支帳

小爾雅空棺謂之櫬有尸謂之柩楊子方言凡葬無墳謂之墓有墳謂之塋今人多混同用之

穿鑿傳會謂之叢殘王充論衡叢殘滿車不成爲道玉屑滿篋不成爲寶

黃庭經尺宅寸田可治生註尺宅面也寸田兩肩閒爲上丹田心爲絳宮田膺下三寸爲下丹田

梵言一年爲一白傳燈錄我止林閒已經九白

韓鄂歲華紀麗大酺小盡註月三十日爲大盡二十九日爲小盡

左傳公孫揮曰子產其將知政矣魏了翁讀書雜抄後世官制上知字如此易繫辭乾知大始知猶主也

廣韻藻竹秋三月也蘭秋七月也

王褒僮約桼槎發等發等沐樹也

日本土風記倭國十二支之巳曰米

仲夏日爲長至仲冬日爲短至今世誤以冬至爲長至堯典仲夏平秩南訛日長至仲冬平在朔易曰短至此其證也正字通夏至日曰長至言日之長於是而極至取極至之義呂

覽十二紀仲夏月日長至是也冬至亦曰日長至言日之長
於是而始至取來至之義禮郊特牲曰郊之祭近長至之日
是也然呂覽於仲冬則又曰日短至據此說短至宜爲冬至
而亦謂之日長至者陽之始長也扶陽抑陰之義也又日至
有大還小還之名淮南子天文訓曰至於鳥次是爲小還至
於女次是爲大還

夫稱婦亦曰良人詩今夕何夕見此良人毛傳良人美室也
按朱註良人夫稱也與毛傳異

虎魄不取腐芥見吳志裴松之註

閩粵人以田種煙謂之煙田見正字通

蠶叢人名成都志蠶叢氏蜀君也

眉目之閒曰衡蔡邕釋誨揚衡含笑左思魏都賦盱衡而誥
五代史補僧謙光有才辯飲酒食肉嘗云但願鵝生四掌蠶
留兩褰足矣

裨王小王也史記衛青傳得右賢裨王十餘人

家語江始出於岷山其源可以濫觴王肅註觴可以盛酒言
其微也是濫觴謂始出之微唐明王孝經序濫觴於漢蓋用
此義近世有指爲末流之弊者誤

陸贄以博學宏詞登科見唐書本傳

正字通古者上下有誥秦廢古稱制詔漢武元狩六年初作

誥然不以命官唐稱制不稱誥宋始以誥命庶官明命官用
敕不用誥三載考績則用誥以褒美洪武十七年奏定有封
爵者給誥如一品之制二十六年定一品至五品皆授以誥
命六品至七品皆授以敕命我朝因之

蜀志靖蛉縣有石豬子母數千頭傳言夷昔牧豬於此一朝
豬化爲石此與黃初平牧羊事相類

史記秦始皇紀夫爲寄貍註夫淫他室若寄貍之豬也

六赤今骰子別名李洞贈李郎中詩云微黃喜兆莊周夢六
赤重新擲印成

叢辰術家名史記曰者傳叢辰註猶今之五行生剋擇日也

姻親爲連史記尉佗傳及蒼梧秦王有連

銅名黃鐵見書呂刑疏

宋子虛名友五子以鑫森森歟立名見正字通註

閭同閭說又有閭無閭今姓譜分爲二

人物志草之精秀者爲英鳥之將羣者爲雄張良是英韓信
是雄

唐李肇翰林志凡太清宮道觀薦告詞文用青藤紙朱字謂
之青詞

相背曰面史記項羽紀馬童面之謂背之不面向也面縛亦
謂反背而縛之杜元凱以爲但見其面非也

聲音和曰韻漢魏以上之書皆言音不言韻自晉以後音降而爲韻矣至韻書之最古者莫如魏李登聲類音呂靜做其法作韻集齊周顒始著四聲切韻梁沈約有四聲一卷隋秦王俊有韻纂陸法言有切韻至唐孫愐唐韻出而諸書皆廢宋陳彭年等重修廣韻丁度有集韻金韓道昭有五音集韻元黃公紹有韻舉要明洪武中宋濂等修正韻此韻書大略也

耳食二字人習用之而目食則罕用宋史司馬光傳飲食所以爲味也適口斯善矣世人取果餌刻鏤之朱綠之以爲槃案之翫豈非以目食乎

杜甫遣悶詩家家養烏鬼漫叟詩話川人家家養豬每呼豬
爲烏鬼聲故謂之烏鬼夢溪筆談夔州圖經稱峽中人皆養
鷓鴣以繩繫頸使捕魚得則倒提出之謂之烏鬼元微之江
陵詩病寒烏稱鬼自註南人染病競賽烏鬼

孫季昭示兒編鼃蛙屬蛙鼃之行勉強自力故曰鼃勉如猶
之爲獸其行趑趄故曰猶豫

晉書朱伺傳江夏太守楊珉每請督將議距賊之計伺獨不
言珉曰朱將軍何以不言伺答曰諸人以舌擊賊伺獨以力
耳

傳燈錄參禪有二病一是騎驢覓驢一是騎驢不肯下

元稹送客遊嶺南詩島夷徐市種廟覲趙佗神

言同百舌膽若燄鼠梁武帝責元慶和語見魏書

南史柳津字元舉或勸之聚書津曰吾嘗請道士上章驅鬼
安用此鬼名耶

諸事音考宋宣和二年有臣上疏設牙牌三十二扇共記二
百二十七點以按星辰布列之位譬天牌二扇二十四點象
天之二十四氣地牌二扇四點象地東南西北人牌二扇十
六點象人之仁義禮智發而爲惻隱羞惡辭讓是非和牌二
扇入點象太和元氣流行於八節之間其他牌名類皆合倫
理庶物器用表上貯於御庫疑繁未行至宋高宗時始詔如

式頒行天下

左昭十九年鄉子言雲龍水火名官服虔因撰出雲龍配五色水火配四時之號孔疏斥其虛而不經是也董含三岡識略言闕賊建設僞官衣服以雲爲級一品一雲至九品爲九雲服說幾類是

溫公通鑑始於周威烈王二十三年命三晉爲諸侯以爲天子自壞其紀綱特著篇首爲後世戒宋樓鑰獨謂此書之作實繼左氏傳溫公不敢顯言之爾左傳以三晉事終通鑑以三晉事始攻媿此論甚確見本集

錢廣伯云趙臺卿孟子注未嘗認告子卽浩生不害因別爲

一人也僞疏疑浩生不害爲告子耳諫庵謂趙氏兩注元有
牴牾未免臆斷又孟子曰告子先我不動心則是孟子弟子
而年亞於孟子可知孟子於弟子稱子顧亭林曾言之若以
孟子稱曰告子疑非弟子則樂正子二之中又何說

晉藝術傳佛圖澄令一童子絜齋七日取麻油合臙脂躬自
研於掌中舉手示童子粲然有輝童子驚曰有軍馬甚衆見
一人長大白皙以朱絲縛其肘澄曰此卽曜也錢詹事云今
俗傳圖光之術蓋出於此

唐德宗取順宗之子諱爲第六子案五代閩陳洪進以子文
顯之子爲子名文頊與父並行劉貢父內殿崇班康君墓志

銘君生二歲失父育於大父大父育爲已子君念父甚至及身登朝求改正昭穆未報肯以孫爲子者唐宋之制尙主者升行與諸父等此何爲乎御覽輩卓別傳卓孫年七歲愛爲已子

明史嚴嵩傳嵩惟一子世蕃呂稼華嘗言昔遊分宜見嚴氏家譜世蕃有兄名世藍家居不仕睦鄰悖族鄉里稱爲善人今之子孫皆其苗裔史佚之也梁處素紀之以詩有云兄豈難爲非競爽子能不肖始稱賢池北偶談謂江右齒錄分宜子孫中式者不列其高祖名爵殆恥爲嵩後并沒世藍耳錄之以補史缺

晁補之詩淮南楊柳春千里尙有多情憶小勝注南都留守使雙鬟勸酒小勝其字也

乾隆四十二年八月 上諭金史世紀稱金之先出靺鞨部古肅慎地本朝肇興東土疆域與金同舊稱滿珠所屬曰珠甲後改稱滿珠而漢字相沿譌爲滿洲其實卽古肅慎爲珠甲之轉音也又 御製全韻詩注滿洲清字本作滿珠我國家肇基於東故西藏每歲獻丹書皆稱曼珠師利大皇帝今滿字作滿洲者蓋因洲字義近地名假借用之遂相沿從俗云

官衙驅使之僕謂之長隨蓋本前明內官之名秦徵蘭天啟

宮詞長隨齋刻鏤金盤自注答應長隨內官之賤者職掌召對欽賜諸項奔走之役鄭曉今言司禮瑞范亨爲逆瑾所忌遣長隨由成等殺之杭堇浦太史有長隨七律四首摹繪最工

杭堇九月十三晴釘韉挂斷繩馮夢禎快雪堂日記載之案占書亦謂是日晴主冬晴柴賤故有釘韉生日之語毘陵胡季莊香奩有釘韉生日詩又明沈榜宛署雜記燕市賣韉人以九月朔日爲韉生日供具祭之以其陰晴卜一冬寒煥極驗

國書石行造字者曰薩海亦作達海沈宮詹荃嘗疏請崇祀

見程哲啓棧齋說朱竹垞韓公菽墓碑云祭酒阿理瑚請以故大學士達海從祀孔廟公以爲造國書一藝爾不可從祀韓議見有懷堂集案本朝制字者有二人一日達海一日

額爾德宜皆謚文成全祖望國書賦云惟兩文成不亞朱襄

或作或述接武擅場又考遼契丹字太祖阿保機製突呂不

耶律魯不古贊成之

見遼史本紀本傳

金女直字完顏希尹撰本名

谷神

章宗明昌五年紀稱葉魯谷神

依倉頡立廟蓋屋例祠於上京納里渾

莊

見史本傳

元初用漢楷及畏吾兒國字至元二十五年勅中書

省奏目及文冊皆不許用畏吾字並用蒙古書乃帝師入思

巴撰郡縣建廟通祀

元史釋老傳

宋何光逢代人充賦取貲卽後世槍替之類其後罹大禍見
宋史蘇易簡傳

任昉述異記梓樹之精化爲青羊五百年而紅天運百年中
變五百年大變所謂劫也唐殷襄藩詩太平從此銷兵甲記
取紅羊換劫年當本此又歲在丁未曰紅羊猶以乙酉爲白
雞殷襄藩詩題作李節度平虜蓋述文宗太和元年丁未李
寶臣李同捷事敬宗無道文宗初立盡革稅政是換劫也宋
高宗建炎元年亦值丁未故皆有紅羊語

岳鄂王恢復中原一日奉十二金字牌班師所得州縣盡失
辛棄疾規畫飛虎軍降御前金字牌俾日下任罷棄疾受而

藏之責期一月營柵成開陳本末繪圖繳進二者孰是曰皆是也岳王措置甚大非旦夕可塞譏謔之口忠敏經度湖南一路事易集而謗易弭所處不同也

小說稱楊老令婆曰余太君不知何本案畢尙書沉關中金石記楊業妻折德展之女世以爲折太君

楊椒山公有王勃然變乎色文隆萬文刻本皆選之尤成述述祖頌言此文乃其先世尤鈿字洵美所作因感時事借名楊公耳又衛壯謀輯明人文行集有楊公會墨禹思天下有溺者一節文乃嘉靖丁未科公在三十八名

品服用補子起於何時汪韓門綴學攷之最詳謂服之花樣

定於洪武二十四年而以本等花樣爲補子自嘉靖七年始
仍用至今若劉若愚無史稱宮眷內臣臘月二十四祭竈後
穿葫蘆景補子上元燈景補子五月朔五毒艾虎補子七月
七鵲橋補子九月四日重陽景菊花補子冬至陽生補子則
又在品服之外隨時戲爲之耳今與夫用海馬補子取善走
也迎春東郊有一人扮春官穿菜補子取生意也當亦有所
始

李卓吾精騎錄云人有被橫逆而欲報復者問於予予應之
曰天方助桀胡可與爭人自以堯吾則何與爭而擊之在我
多費博浪之椎徐以制之在渠自有烏江之劍况彼之叫跳

有識者已鄙其狂而我以安閒無知者亦服其量使丙夜而深思彼之含羞其將何解即終身而不報我之得勝亦已多矣此雖一時曉解之語可以消世人許多不平之氣

一失脚爲千古恨再回頭是百年身莫放過了合做親切底工夫莫虛度了難得少壯底時日

唐裴炎之序猩猩也曰與之酒兼與之屐醉酒穿屐則擒而刺血隨所問而得否則甯死含血不與夫身死矣而猶斬於血獸之愚若此人之靈於物而其愚有類是者今天財色名利之溺人也其猩猩之於酒乎爵賞祿位之羈人也其猩猩之於屐乎饕餮致禍重利忘身至死而無悔者其猩猩之甯

死含血乎

馬之性善驚故驚駭字從馬女之性善妬故嫉妬字從女此制字之精察也

宋書孝義傳郭世道會稽永興人世傳郭巨埋兒卽世道事南史作世通

蘇東坡初到黃州詩云只慙無補絲毫事尙費官家壓酒囊自注云檢校官例折支多得退酒袋按文獻通考文臣料錢一分見錢二分折支陸錫能曰自注所云折支者謂以他物代錢也退酒袋者官法酒用餘之廢袋也蓋宋時俸料每以他物折抵退酒袋卽折抵之物耳又通考載楊億言半俸二

分之內其二分以他物給之鬻於市廛十裁得其三今先生云檢校例折支并一分見錢亦不得也

孟子知好色則慕少艾注艾美好之貌考經文字書艾字並無訓美好者孫履齋曰當如荀子妻子與則孝衰於親之義少字上聲艾如夜未艾艾字止也謂人知好色則慕親之心少止也又程氏考古亦曰艾當如父慕少艾云者慕差減於孺慕之時也此解殊勝

論語公治長雖在縲絏之中非其罪也案五倫書注季康子弑嫡子連及公治長故以在縲絏爲非罪留青日札載長通鳥語因語得死羊被人以偷訟魯君繫獄後復以鳥語得釋

仍厚賜之此俗傳鄙俚之說今四書人物考悉載之而不及
弑嫡本事或亦未及見也

禽經雉上有文鵠上有赤赤與尺同雉上飛能丈故計丈曰
雉左傳都城百雉是也鵠之上能尺故云有赤字又作斥莊
子云斥鵠是也

左傳周子有兄而無慧注不慧世所謂白癡

焉止園塞外雜記瀚海有數十百里者有千餘里者但有沙
石而無水泉石中明亮多山川人物之奇形五彩雲霞之變
色光華燦爛莫可名狀蓋無形之水皆藏於石中也又曾於
御史某處見瀚海石朝珠一串中多水草魚蝦之屬無不酷

肖其形 甯古塢北犬多於眾畜且大而有力冬春之際冰
雪載道凡薪米之物皆用冰牀裝載縛犬數十拉運長鞭以
驅犬行疾而冰更滑日馳數百里 自烏蘇里以北家家使
鹿亦猶三姓之使犬也不特駕車亦可乘騎昔有扶南國以
鹿駕車今信然 北海人多數百齡者百歲而死便爲殀矣
其冬三時亦如平人惟冬至之日一家男女老幼閉藏密室
共爲長夜之寢至來春雷響則起如蟲入蟄然 哈石馬卽
水鷄也在石隙中皮黑而油珠滿腹以香糟製之則油不化
鮮而且肥關東口外有之